

Sra. Debby Arends - Gietel, cabesante scol basico Mon Plaisir:

E siguridad pa nos muchanan ta na prome luga

ORANJESTAD- Durante ceremonia di firmamento di e gunning na C2 Construcción, cual ta e compañía cu a gana e bid pa ehecuta e trabao di renovación di e cura actual di Mon Plaisir Basis & Kleuter, nos a haci uzo di e oportunidad pa puntra Sra. Debby Arends - Gietel, kende ta e cabesante di e parti basico, kico e proyecto aki ta nifica pa su scol y principalmente pa su alumno y docentenan

“Banda di sigura un atmosfera, un bon guia pa e muchanan por sigui nan es-

tudio riba un base diario na nos scol, tambe ta hopi importante cu mi por sigura nan cu nos a percura pa siguridad rond y riba e tereno di scol”, e la cuminsa na enfatisa. “E acuerdo aki, caminda awo nos por wak cu e lo bira un realidad caminda e 2 scolnan aki muy pronto lo conta cu un cura completamente nobo, ya yena mi cu alegría. Esaki tabata e cherry riba e bolo cu tabata falta pa asina aki nos scol ta completamente renoba”.

Banda di e siguridad, e porta actual cual ta completamente benta abou, como tambe e



hanchura cu e tin no ta apto pa un brandweer of un ambulance por subi e tereno sin dificultad. Subimento di terreno, despues cu e cura ta cla, lo

bira hopi mas difícil ya cu e lo tin un altura basta haltu como tambe e porta nan lo ta bay ta na lock cual ta haci practicamente imposibel pa por subi

tereno di scol sin avisa of pa haci daño na e scol.

Mon Plaisir Basis & Kleuter na inicio di aña escolar 2014 – 2015 a drenta nan edificio completamente renoba. Una bes esaki a tuma luga a nota cu toch tabata falta algun aspecto den e bestek anterior. Pa esaki tur alumno, docente y cabesantenan kier a gradici e mandatario encarga cu enseñansa, Minister Michelle Hooyboer-Winklaar pa a logra aloca extra fondo pa por a haci posibel cu dentro di poco nan lo tin nan cura completamente nobo. □